



Naalackersuisut kingusinnerpaamik UKA2019-imut inatsisinik atuuttunik allangortitsinissaq pillugu siunnersuummik saqqummiussinissaat, taamaaliornikkut eqqumiitsuliornermut aningaasaateqarfimmik pilersitsinikkut eqqumiitsuliornermut aningaasaliissutinik tamanik agguaassinermi attuumassuteqannginnissamik pilersitsinissaq periarfissinneqarsinnaanissaat ilanngullugu Inatsisartuni aalajangiiffigissassatut siunnersuut.

(Inatsisartunut ilaasortaq Peter Olsen, Inuit Ataqtigii)

(Siullermeerneqarnera)

Qujamasuutigisariaqarparput taama amerlatigisunik eqqumiitsuliorortoqaratta, ullutsinni naliginarni uangutsinnik akimanerulersitsisunik. Qalipaallaqqissorsuarnik peqarpugut, nipilersullammannik, atuakkiortullammannik, assassullaqqissunik aamma allarpassuit taagorsinnaagaluarpakka.

Eqqumiitsuliorneq nunatsinni uummaarippoq ingerlalluarlunilu. Eqqumiitsuliorlut tapiiffigeqqullutik qinnuteqarsinnaanerannut periarfissarissaarpoq Namminersorlutik Oqartussat aqutugalugit aamma aningaasaateqarfiit namminersortut nunatsinni aamma soorlu Danmarkimi.

Manna siunnersuut aqutugalugu IA-p pisortat aningaasaataat atorlugit eqqumiitsuliornermut aningaasaateqarfimmik pilersitsiniarpoq qularnaarumallugu agguaassinermini arlaannaannulluunniit attuumassuteqanngitsut agguaassisalersinnaanissaat. Aamma IA allappoq, naleqquttoq eqqumiitsuliornermut aningaasaateqarfimmik pilersitsinerlutik atatillugu allaffissornermut aningaasartuutit Landskarsip aningaasaliissutigissagai.

Demokraatini arlaleriaqaluta oqaatigisarparput pisortat allaffissornerat tassungalu aningaasartuutigineqartartut amerlavallaarujussuurtut. Tamanna soorunami aalajangiusimavarput aamma siunnersuut tapersorsinnaanngilarput pisortat allaffissornerannik tamakkiisumik akisunerulersitsisussa. Taamaattumik siunnersuuteqartoq apererusupparput allaffissornerup ilaani sumi aningaasanik taava sipaartoqassanersoq eqqumiitsuliornermut aningaasaateqarfimmik pilersitsinerlutik aningaasartuutit akissaqartinneqalissappata?

Iluuqutanngilaq Landskarsip nammakkersortuarnissaa aningaasalersuinissamut isumassarsianik saqqummiussinngiivilluni.

Tamatuma saniatigut Demokraatini paarsivarput Naalackersuisut EPI suleqatigalugu Namminersorlutik Oqartussat kulturimut aningaasaliissutaasa ilaannik agguaassinermini attuumassuteqannginnissamik ingerlanneqalernissaat anguniarlugu. Suliap tamatumap inerneru qilanaarluta utaqqissavarput. Kisianni



erngerlunga oqaatigissavara uumap suliap kinguneranik pisortat allaffissornermut aningaasartuuteqalernerulissappata, tamanna Demokraatini akuerinaviannnginnatsigu. Taamaattumik maannagaaq Naalackersuisut apererusuppakka aningaasartuuteqarnerulinginnissaq neriorsuutigisinnaaneraat.

Taamatut oqaaseqarluta siunnersuutip itigartinneqarnissaa inassutigaarput.